

戊午福建行省叅政魏天祐獻計發民一萬鑿山鍊銀歲得萬五千兩天祐賦民鈔市銀輸官而私其一百七十錠臺臣請追其賊而罷鍊銀事從之改燕南河北廉訪司還治真定高麗女直界首雙城告饑救高麗王於海運內以粟賑之弛平瀼州酒禁詔不敦忙兀魯迷失以軍征八百媳婦國九月己未朔治書侍御史裴居安言月的迷失遇盜起不即加兵盜去乃延誅平民詔臺院遣官雜問之辛酉詔諭安南國陳日燭使親入朝選湖南道宣慰副使梁曾授吏部尚書佩三珠虎符翰林國史院編修官陳孚授禮部

郎中佩金符同使安南山東東西道廉訪司劾宣慰使樂實盜庫鈔百二十錠買庫銀九百五十兩官局私造弓勒等物受屯田鈔百八十錠樂實宜解職從之丁卯中書省臣言茆蕪十圍安化等新附洞蠻凡八萬耳設管軍民司以其土人蒙意蒙世莫仲文爲長官以呂天佑塔不帶爲達魯花赤八番幹羅思招附光蘭州洞蠻宜置定遠府就用其所舉禿干高守文黃世曾燕只哥爲達魯花赤知府同知判官制曰可癸酉徙沔州治鐸水縣廢新得州置通江縣復漢州綿竹縣沙州瓜州民徙甘州詔於甘肅兩界畫地